

**Landesbibliothek Oldenburg**

**Digitalisierung von Drucken**

**Jahrbuch für das Oldenburger Münsterland**

**Vechta, Oldb, 1969-**

Werner Kuper: Mit Rükkelwaoter dör dei Wüste

**urn:nbn:de:gbv:45:1-5285**

---

Werner Kuper

## Mit Rükkelwaoter dör dei Wüste

Vöriges Johr keek ick mi in'n gröttern Ort in Südollnborg eis an, wo dat so inne Adventstied woll inne Geschäftsstraoten utseeg. Van Advent wör dor nich alltauval tau marken. Dei Sterns, mit elektriske Birnens tau'n Straohlen bröcht, lüchten vanne Straotenmastens daol.

Inne Schaufensters wörn dei Geschenke un Wiehnachtssaoken achter gollen un sülwern Wiehnachtskugeln utstellt un mit Schnei un Glimmerstriepens äöwersaiht. Üm dei farigpackten Pakete harn sei gollen Bändkes bunnen. Bi'n Bäcker leegen dei witt äöwerpuderten Wiehnachtsstutens, wor dei dicken Rosinen un dat Judenspeck baoben noch rutkeeken, mit bunte Kaukenkerls un bruunt Beschüüt in eine Riege. Dei rosa Marzipanschwienkes mit ehren krüllten Stert plieren mi an, at wenn se seggen wullen: „Nu koopt mi doch!“ Aals wör mit Puderzucker, Schokolaode und bunt Streiwarks upmaakt, dat ein' bi't Ankieken all dat Waoter in'n Munn' tausamenlöp.

In'n Schlächterlaoden harn dei Wüste un Schinkens aal'n roet Bändken mit'n lüttket Dannenstrüüksken dran üm't Lief krägen. Vör dat Schaufenster van den Spälwarenlaoden keeken dei Kinner sick boll dei Oogen ut'n Koppe. Sei täuwen immer weer up den elektrischen Zug, dei dor so val Puuste har un aale halwe Minuten van neien ut'n düstern Tunnel rutkriepen köm. Ut't Radiogeschäft näbenan klüng mi all fierlick dat Lied vanne hilligen Nacht tau-meute. Un in dat Fenster van den Tüüglaoden flittkede tüsken dat fiene siedene Ünnertüüg ein wittgollen Pappengel mit dicke roe Backens herüm, dei nicks anne Fäute har un sick woll jüst'n poor dicke wullen Strümpe ut dei välen Geschenke rutseuken wull.

Dann köm ick an dat Fenster van den Drogisten vörbi. Wat dat dor nich aal geef! An eine Siete'n groten Schneikerl, dei mit sienen dicken Schaol üm'n Hals tau so utseeg, at wenn hei sick verküllt har. An siene langen, roen Wuddelnäsen hängen Iespingels. Üm sick warm tau holen, wull hei sick dor jüst'n lüttken Grog achter-nahn. An dei ännern Siete in dat süftige Fenster kömen doch

---

wohrhaftig all die Hilligen Drei Kääönige ut't Morgenland anstrien un wullen ja woll nao dat Jesuskindken in den Stall hen. Dei eierste Kääönig hüllt in siene Hannen'n schönst Stück fiene Seipen, dei tweede wiesde'n Buddel Rükkelwaoter van eine bekannte Köllske Firma vör, un dei drüdde, dei dor mit dat schwatte Gesicht un den bunten Wickel üm'n Koppe, har doch würllick'n modernen Rasierapparaot up siene Hannen liggen un wull dormit woll nao't Jesuskindken tau. Dat wör mi doch jüst naug: Dei Hilligen Drei Kääönige trücken dor mit sücke unhillige Saoken vörbi, un dat Kamel, dat achter ehr anköm, schläpde noch'n Sack vull Pakete up'n Puckel, wor anschräben stünd: „Fröhliche Weihnachten mit After-Shave-Lotion“. — Jao, dei Hilligen Drei Kääönige un ehr Kamel mössen doch för aals herholen, wenn sei dor mit Seipen, Rükkelwaoter un Rasierapparaote dör dei Wüste schickt wüdden! Aower mit Adventstied un Naodenken äöwer dat, wat Wiehnachten up us taukaomen schull, har disse Flitterkraom inne Schaufensters nich väl tau daun.

*Böener  
Sternsinger.*



---

*Margret Buerschaper*

## Zwischen den Wegen

Zwischen  
den Wegen

Rosen  
Cosmea  
Hainbuche  
Ahorn

Zwischen  
den Wegen

Aufenthalt  
Rast  
Rückschau  
Planung

Zwischen  
den Wegen

Umsinken  
Ausruhen  
Vergessen  
Neubeginnen

Zwischen  
den Wegen

Wachstum  
Reife  
Begreifen  
Erkenntnis

Alles Entscheidende  
zwischen den Wegen

---